

3. juni 2014

UPA 2014/157
Karl-Kristian Kruse

**Sinerissami tarnimikkut nappaatillit assigiiaannerusumik pitsaannerusumillu sullinneqarnissaat anguniarlugu Namminersorlutik Oqartussat kommunillu qanoq iliuseqarsinnaanerit pillugu apeqquteqaat aallaavigalugu oqallisissiaq.
(Inatsisartunut ilaasortaq Agathe Fontain, Inuit Ataqtigiit)**

Oqallisissiamik saqqummiussaartoq Agathe Fontain Siumumiik qutsavigaarput.

Matumani oqallisissiami sinerissami tarnimikkut nappaatillit assigiiaannerusumik pitsaannerusumillu sullinneqalersinnaanerit siunissami anguniartuaqqullugu oqallisissiaavoq, tamannalu Siumumiik iluarisimaarparput siusinaarluni iliuseqarneq inuiaqatigiinnut minnerunngittumillu tarnimikkut napparsimasunut alloriarfiusarpoq pingaarutilerujussuaq Siumumiillu siusinaarluni iliuseqarsinnaaneq tamatigut peqataaffigalugulu nalilersuiffigisarparput.

Siumumiillu tarnimikkut napparsimasut pillugit aaliangiiffigisassatut siunnersuutaasoq imm. 156 suliarineqarnera innersuukkusunnarpoq, qujanartumik 2017 utaqqinagu ukiut tamaasa tarnimikkut napparsimasunut atugassarititaasut sullinneqartarnerannut pitsaassusaannullu nalilersuiffigineqartalernissaat amerlanerusuniik ilalersorneqarluni akuerineqarmat.

Siumumiillu oqallinneq manna aamma nalilersuisarnermi atorluarneqarsinnaammat pingaartutut isigalugu imaattumik oqaaseqassaagut.

Siumup siunniussaasa ilagilluinnarpaat tarnikkut peqqissuunissaq aqqutissiuuttuassallugu. Ullumikkut tarnimikkut napparsimasut sullinneqarnerisa atugassaqartinneqarnerisalu pitsaannerusumik aqqutissiuuttuarnissaat siuliani eqqartuinitinni alloriarfissaqalersipparput. Mannalu oqallinneq aamma aqqutigalugu amerliartuinnannginnissaat ataatsimoorluta suleqatigiiffigisariaqarparput, ilaatigut saaffiginniffissat ajornartorsiuteqarnermi suli annertusarnerisigut aammalu qaammarsaassutiguarnerisigut.

Kalaallit uagut annertuumik nukittuffigaarput ajornartorsiutinik toqqorterineq aammalu matorineq, ilaatigullu ajoraluartumik tarnikkut nappaateqalernermit kinguneqartarluni, aallaaviisa annertuut ilagaat nukittuffitta ilagimassuk kukkussutaasunik nakkarsaaneq annertoq atorsinnaasaratsigu, inuiaqatigiinnut ajunngittortaasut annerusumik takutikusuttarlutigu, nuanninngittortaallu toqqortertarlutigu, tamanna allanngortittariaqarparput inuiaqatigiit ikioqatigiittut nukittuullu aqqutissiuuttissagutsigit ajunngittuni oqimaassinnaasunilu suleqatigiinnerusariaqarput tapersersoqatigiinnerullutalu.

Ilaatigullu imigassamik ikiaroorntumik atuivallaarnerup kiguneranik tarnikkut peqqinnikkullu innarlugaasarneq annertuvoq aamma, annertuumillu oqallisiginissaa pingaaruteqarluni, ulluni ukiunilu tulluuttuni atornerluisuunerup aanngajaarniutinik kinguneranik tarnikkut peqqinnikkullu innarlugaasarneq annikinnerulernissaanik suleqatigiinnissarput, aqutissat pingaarluinnartut ilagaat imminut nassuerutigisinnaaneq ilaqutariittut imaluunniit ataasiakkaatut nassuerutigineq aqutissaavoq pingaaruteqarlunnartoq.

Taamaarttorli nunami kaperlattartumi qaamaannalertatumilu najukkatsinni aamma inunnut sunniutigisartagaasa kinguneranik tarnikkut sakkortuumik aqqusaarisarnera ilanngullugu eqqartorneqarsinnaavoq pingaaruteqartoq, siuliani oqaatigisattuut nakkarsaaneq anner-tooq atorneqartarmat qaffasittumik kalaallimik atorfinittoqarpat ajutoornissaata tugaanut oqallinnerit nuanniitsut aallartittarput, kalaaleq ineriartorlualerpat naalliiniarnerit imaaginnavittarput ajutoornissaata tungaanut.

Soorunami tarnimikkut napparsimasut qulaani taasakka kisiisa aallaaviginngilaat, inuttut sakkortoorujussuarnik nalaataqarnerit atornerlugaanerit qanigisanik annaasaqarnerit ikinngutinik annaasaqarnerit il.il.

Qujanartumilli aamma ammanerusumik inuuneqarneq amerlasuutigut takussaanerujarporpoq neriuutiginarporlu suli ammanerusumik inooriaaseqalernissarput inuiaqatigiit peqqissut tapersersoqatigiittullu ingerlaqatigiilernissaat anguniarlugu.

Kiisalu kaallisut oqaasillit tarnikkut napparsimasunik sullissisinnaasut pigilersimasavut aqutissiuussipput kalaaleqatitta aamma nammineerluta pittaasumik sullinneqarnissaanik, suli pisariaqartitavut amerlapput, taamaattumik kommunit Namminersorlutillu Oqartussat suleqatigiilluarnissat avaqqunneqarsinnaanngilaq sullissinerup pitsaanerusunngortinneqarnissaanik anguniagaqarnermi.

Kiisalu Siumumiik oqallisissiami sulisut atugaasa ilanngunneqarnerat nuannaarutigaarput siunniussat anguniakkallu angussagutsigit sulisunut atugassarititaasut aamma inuttut oqimaassinnaasumik suliaqarnerannut naleqquttumik atugassaqartinnissaat avaqqunneqarsinnaanngimmat, sulisullu pigiinnassagutsigit tikisitat nunaqavissullu akissaatimikkut assigiinnerusumik atugaqalernissaat naalakkersuinikkut angusariaqarpoq pingaarutile-rujussuaq.

Siumumiik taamatut oqaaseqarluta siuliani innersuussarput Inatsisartut aaliangiiffigisaat ippassaq aappassaaneerpeqartoq imm. 156 sullissinikkut pitsaanerusumik kingunekar-tussaqaq alloriarfiusussarlu iluarisimaaratsigu oqaatigeqqissavarput.

Neriuppugut oqallinneq manna sullissinerup pittaannerusup tugaanut atorneqarsinnaasunik pissarsiffiussasoq. Qujanaq.